

懷 舊 集
焦 山 紀 遊 集



卷一

上

卷二

下

卷三



焦
山
紀
遊
集

馬日珩等編

中
華
書
局

焦山紀遊集

此據粵雅堂叢書
本排印初編各叢
書僅有此本

京口金焦二山爲天下絕景。金山去瓜洲咫尺。南北帆檣所經。焦山相去稍遠。茗亭幽寂。孤峙盤渦巨浪。閒遊人跡罕至。東坡云。同遊盡返決獨往。賦命窮薄輕江潭。自非耽奇好事者。未易津逮也。予平生三遊。皆馬君嶰谷半查爲之主。一在庚戌冬。一在丁巳夏。今年戊辰冬。仲之望。復因江月發興。同游者凡九人。往返兩宿南莊。留山中凡三日夕。人各賦詩七首。聯句一首。次第爲一集。屬予序之。以見茲遊之不易。而江山倡酬之爲可樂云。樊榭老民厲鶚。

焦山紀遊集

雷家橋道中

清 錢塘厲 鶚樊榭

問訊城東路，還同輞口尋。江天遠不極，雲日淡相侵。牛嬾仍眠壘，鴉寒後出林。重來水竹地，情愜話幽深。

冬夜宿南莊

平生苦愛竹與梅，西溪有約鉏耜苔。我行北地少二友，衣塵滿罷空歸來。歸來仍向韓江寓，出郭雲陰風色暮。招要君履南莊遊，舊是梅多竹深處。疎林四面開草堂，卜夜更卜子夜長。竹搖萬个酒燈綠，梅放數枝詩硯香。彷彿西溪十八里，月痕浮動追春始。江雨無端竹裏鳴，不教梅影橫窗紙。

焦山觀音巖晚望用宋人趙冰壺韻

手剔磨厓舊跡存，江風爲掃凍雲昏。山當落日如爭渡，帆向遙天欲倒吞。絕頂僧棲同怖鴿，空廬人去有驚猿。廿年三到緣非淺，好掬清波洗眼根。時予方病目。

焦山看月以江流有聲斷岸千尺山高月小水落石出爲韻得聲字

焦山寺裏鐘始鳴，焦山寺前江月生。此時月上潮復上，風水相薄爲奇聲。餘音瑟瑟獵枯荻，磔然飛起棲禽驚。長波萬里入杳靄，中流一道馳空明。數星莫辨北固火，幾點不送南徐更。羣峰隔岸悄如睡，何事買

船貪宵行，吳頭楚尾兼越角。我輩聚如九子萍。

同遊者九人。

珉石興來弔鶴瘞，瓊田望去呼龍耕。坐久起踏松影碎，滿地簾窸霜花橫。琉璃宮殿水精域，佛界盡在寒而清。良朋偉觀難易得，天教今夕二者并。高吟坡公赤壁句，一尊酌月還同傾。

登雙峯閣得翠字

香閣如危巢，細路盤折至。頗覺筋力衰，不辨舊題字。爐煙浮江光，帆影移竹翠。此間坐永日，自爾絕人事。將爲禽倚游，未免周何累。歸歟復徘徊，短策耐寒吹。

歸宿南莊二絕

江山奇絕足盤桓，歸向梅花說夜寒。一片水精庵外月，隨人小倚曲闌干。多少長安車馬塵，故園空鎖一園春。板橋修竹風燈裏，始覺林亭有主人。

仁和杭世駿菴蒲

霍家橋道中

安穩盤輿上，城東路易尋。斷崖低樹亞，荒徑伏流侵。曙色分茅屋，寒煙散竹林。南莊招隱處，知是閉門深。

冬夜宿南莊

澄江月落潮初生，茅堂會宿夜氣清。羣峯遠向天際沒，一鳥不來竹裏鳴。江梅有意娛遠客，幾朵疎花寫幽格。雲頭不放月娥窺，特遣燈燈照瑤席。席間難辨花微茫，紙屏影臥橫枝長。冰肌恐受一塵污，飛雨來

瀝風前香。香細風清吹不斷。醉脫貂裘招酒伴。巡檐嗅蕊漫商量。邀勒冰霜與春換。

焦山觀音巖晚望用宋人趙冰壺韻

山腰寂歷一庵存。傳是坡仙跡未昏。返照炯如留客看。崩崖峭不受潮吞。盤空鵲認斜行雁。穿徑僧疑倒飲猿。坐久天風更飄忽。欲同瘦策臥雲根。

焦山看月得落字

平生眼界超塵縛。欲向江天寫寥廓。纖阿期我招提游。放出寒光踐宿約。已驚晃朗辨諸峯。漸喜蒼茫認煙郭。濕銀灑灑和江流。清境搖溶兩難攫。九霄燈彩助清懷。萬里分濤恣展拓。須臾噓氣號陰壑。棲鵲驚飛觸檐鐸。大聲忽起接潮頭。猛力時來打山腳。蘆人縮頸不敢窺。帆葉誰能更輕掠。振衣起躡山徑高。光動空林葉零落。悄然靜聽魚龍吟。呼酒時同石闌酌。

登雙峯閣得山字

凌虛結遐覽。一庵翠微閒。石磴穿鳥道。瘦策同躋攀。了了修眉蜨。遙見江南山。喧濤寫下過。白雲窗中還。清景迫短晷。後遊恐緣慳。霜鐘發深省。鐫銘留孱顏。

歸宿南莊二絕

江風一路洗車塵。凍鳥窺枝解喚人。同到竹籬呼月出。月輪新較寺門新。風燈依舊澣迴廊。竹外微微弄暗香。我共梅花清不寐。冷吟閑喚到昏黃。

錢唐陳章竹町

霍家橋道中

平野霜花白。南莊復此尋。山光車上見。寒色帽簷侵。潮落薺微港。風生松竹林。入門雞叫午。脰膊短籬深。

冬夜宿南莊

草堂幽絕江之濱。夜氣不寒如淺春。相期會宿乃勝舉。尊前八九皆詩人。平生有味是清苦。坐對吟燈近窗戶。未聞臘月抹輕雲。初放疎梅濕微雨。東頭竹篠無塵埃。抱被曾爲桃花開。重到只消羊腍熟。欲眠易感雁聲哀。飄然夢落焦山頂。欒櫟深村復驚醒。不妨吹作雪溟濛。待曉乘潮放孤艇。

焦山觀音巖晚望用宋人趙冰壺韻

老樹寒無片葉存。空亭坐斷未黃昏。金篩日腳凍雲裂。雪走濤頭暮靄吞。清迴神魂悲嘯鶴。衰遲筋力羨騰猿。漁舟三五已棲泊。風笛一聲崖石根。

焦山看月得石字

龍宮幽黯松陰夕。月吐寒雲松轉碧。出門滿眼大江橫。人影林林沙澈白。被酒狂呼興頗豪。凌風我欲生雙翮。濕漑山根若動搖。只疑踏著金鼇脊。清吟有句仙可到。奇境得人天不惜。殘蘆映壁響蕭蕭。驚鳥帶波鳴格格。宵深猶見走帆檣。應羨吾儕更閑適。舊遊蹤跡尙可尋。歲序回頭浪崩迫。已未四月曾遊明朝蘸筆欲題名。爲喚僧繇掃巖石。

登雙峯閣得竹字

飛閣冠山椒。僧語墮空谷。登臨翼瘦筇。蔽翳入寒竹。霜晴午氣暄。遙峯肆流矚。雲日弄江光。搖溶隔疎木。棲林意多愜。理棹情未足。風濤百里閒。三過尙可卜。

歸宿南莊二絕

竹搖風葉欹斜影。梅放霜枝一兩花。窗裏疎燈窗外月。絕無人語響煎茶。迴船又向草堂眠。面面疎籬護冷煙。幽夢更誰拘束得。江聲月色寺門前。

長洲樓錡于湘

霍家橋道中

東臬開別墅。今喜得幽尋。沙漲寒流縮。山橫曉色侵。人家遙翳竹。野寺半依林。十里江村路。清遊興轉深。冬夜宿南莊

蒼茫遠送暝色來。主人留客沽村醅。更長燭短興不淺。檐外玉梅花半開。向夜氣暄雲忽黯。昏黃淡月吐復掩。雁落沙汀一兩聲。雨吹煙樹四三點。此時心跡已雙清。題詩更喜追羣英。却笑當年王給事。輞川倡和惟裴生。酒闌對榻蟬聯語。幽歡直欲忘冬序。高枕翻憐近渚清。與鷗同夢爲鷗侶。

焦山觀音巖晚望用宋人趙冰壺韻

隱士蝸廬跡尙存。峴來山徑未全昏。風濤洶湧聲相軋。吳楚蒼茫勢欲吞。鳥下片帆輕似鳥。手中短策健

于猿高懷誰復同坡老擬結茅庵淨六根

焦山看月得水字

平生夢想焦山寺客櫂經過不曾弭今日扶筇絕頂來一九海月騰空起瑤宮玉宇豁層雲倒壺江流數千里人生快意安可期好景當前豈徒爾有酒須傾一百杯狂歌大笑蒼崖裏夜久空林風怒號拍岸驚濤駭吾耳溯鈞直欲走魚龍杳眇翻疑泣山鬼北固南徐盡渺漫尚有孤帆去如駛縱步閑尋枯木堂滿地清光瀉鈴水

登雙峯閣得磬字

絕頂構飛甍遠覽大江勝振策同攀躋放眼發高興海上羣峯趨中流寒日曛俯覺四天空時見一帆正冶翠濕衣襟叢竹翳苔徑紆回捫煙蘿杳杳落山磬

歸宿南莊二絕

日落遊人江上歸閑丁掃徑犬銜衣梅梢冷挂江天月一夜清輝浸竹扉
暫向園亭寄此心夜闌燈火隔林深却憐主客同幽興樓下敲棋樓上吟

祁門馬口瑄嶺谷

霍家橋道中

車鳴十五里南郭且閑尋冷翠風前亂古香雲外侵人因吟秀句天爲寫寒林更待來朝雪平田一尺深

冬夜宿南莊

空江欲雪雲冥冥。天低月暗吟寒廳。獨雁時聞四窗白。雙眼乍合孤燈青。敗蘆叢篠環沙尾。幾樹橫斜映清泚。未春先已發幽香。歲晚籬邊見冰蕊。城南小築掩柴荆。裊裊茶煙客思清。夜犬無聲人語寂。枯棋坐隱已三更。短童首觸屏風臥。檐外一聲驚雀墮。蕭騷水閣紙衾單。有夢不愁花底澆。

焦山觀音巖晚望用宋人趙冰壺韻

水色嵐光萬古存。我來剛是洗靈昏。咸池接日東南坼。雲夢連江八九吞。風裏迴翔天外鶴。佛前吟嘯樹頭猿。長空一望襟懷豁。喚取山杯捧竹根。

焦山看月得月字

十年不到浮玉山。夢裏時時幽興發。琴聲憶著冷侵肌。詩思尋來清入骨。天公從古妒佳遊。未必重登還見月。今朝賈勇排帆過。正值晴冬寒不冽。夜深雲淨五三星。浪湧潮翻逼銀闕。望處澄江徹底明。吟成遠岫排空沒。黃蘗苦竹舞平沙。驚起香林定巢鶻。同行有客氣最豪。把酒披裘坐巖窟。廣寒八萬四千戶。要與江山助奇突。人生此境豈常遭。拾得莫教隨手擲。經窗且復嗅梅花。海風吹我蕭蕭髮。

登雙峯閣得清字

彘脊躋巖閣。宋上心轉驚。不知俯瀨洞。直擬凌空明。飛鳥在其下。白雲隨我行。遙天望不極。滿耳風濤聲。沈澗露馬散。襟抱爲之清。欲下還徘徊。勝境能移情。

寒夜石壁庵聯句

爲愛焦山好，清冬況得朋。（曰瑄）來因海月滿，宿憶翠微曾。（鷗）梵室鄰峯勢，經樓避石稜。（士庭）閑牆塵外拂，吟借佛前燈。（曰瑄）風動飄金磬，天高淡玉繩。（世駿）松濤時警鶴，芋火漫隨僧。（章）梅氣黯芬馥，江聲聽泐泐。（華）靜參禪一味，冷泥酒三升。（鍾輝）夢擬靈祠乞，銘從古鼎徵。（錡）帶圍思楚玉，像綉展吳綾。（曰瑄）寺有楊文義公玉帶，已爲僧付寶庫。宋繡佛尙存。舊事添圖譜，奇懷入寢興。（鷗）泓更蓮漏續，龍藏竹錐騰。（士庭）篆印銷婆律，牀敷暖毳毼。（曰瑄）空談對劉勰，名理叩張憑。（世駿）覆局棋收雹，停毫硯結冰。（章）森森寒氣冽，皛皛夜光澄。（華）興劇渾無寐，神淒恐不勝。（鍾輝）明朝放歸棹，游思尙飛騰。（錡）

歸宿南莊二絕

乘潮又放南莊棹，恰似春風二月初。
籬外疎梅梅外竹，併教寒月浸塔除。
全憑沙鳥作詩媒，更藉寒花佐酒杯。
何事幽人耽寂寞，未曾十日兩回來。

歙方士庭西嘯

霍家橋道中

江天宜遠望，出郭遂幽尋。
路滑霜初霽，蔬香雪未侵。
危橋橫斷浦，矮屋露疎林。
記取頻游處，門前流水深。

冬夜宿南莊

茅堂小築清江曲，四面疎林閒修竹。
深冬氣暖如春溫，襖被相期此閒宿。
打魚沽酒招吟朋，昏黃待月張

華燈小梅檻外香初動。柔艣溪頭水未冰。寒夜沈沈過夜半。人影花枝互凌亂。歡情且喜共蕭閑。世網從教絕羈絆。老夫子月度荒村。寒枝嗅蕊清心魂。明朝更鼓遊山興。拾級攀蘿望海門。

焦山觀音巖晚望用宋人趙冰壺韻

佳處留題片石存。深冬一豁倦眸昏。孤帆極浦時明滅。落日洪波互併吞。下見疎林拳凍雀。恍聞斷壑叫哀猿。茅庵小結知何日。擬向空山懺鈍根。

焦山看月得流字

浮玉山中三日留。霜辰氣候如清秋。時冬已仲月始望。盈盈素魄俄當頭。支筇拾級石上坐。笑招吟侶延緇流。奔濤入耳勢澎湃。寒風拂面聲颼颼。南徐北固咫尺近。金山鐵甕煙雲浮。憶昔兵戈此重鎮。中分上下如咽喉。寄奴人豪竟何在。霸王功業將何求。空餘明月入遙望。往事欲問惟江鷗。今夕且酌曲阿酒。莫因感慨妨清遊。

登雙峯閣得房字

尋幽陟峯頂。上有青豆房。虛窗納遙景。正在江中央。高空偃古柏。仄徑羅修篁。四顧波汨沒。一瞬雲飛揚。置身半天際。悅欲凌風翔。何當了塵事。稅駕山水鄉。

歸宿南莊二絕

雙峯縹緲翠微間。三日閑遊一棹還。喜有寒梅疎月在。不教清景讓焦山。

柴門乍啓人重到，短句聯吟興轉增。永夜霜風渾不覺，小橋斜界半池冰。
祁門馬曰璐半查

宿家橋道中

客有探幽興，村田一徑尋。招邀農事暇，珍重歲寒侵。木落見遙水，梅香指舊林。卻看籬落近，微詠夜燈深。
冬夜宿南莊

梅花一枝橫碧沼，似爲荒村破枯槁。詩人衫袖有春風，淡月窺人沉林表。牀鋪丁字聯清冬，四圍山木霏微中。天自時閒雁行過，窗虛更覺江天空。獨我吟聲何太苦，月色花光互吞吐。詩成遙蒼遠山鐘，夜靜不傳街市鼓。人生會合安可常，趁取酒熟清而香。明朝更放煙江棹，水宿雲眠枯木堂。

焦山觀晉巖晚望用宋人趙冰壺韻

雲磴依稀屐齒存，茅亭登歷海光昏。晉兼吳楚人重到，氣壓曹劉句早吞。萬里奔流浮落日，十年清景問棲援。江山佳處歸長望，嘯倚天風坐石根。

焦山看月得高字

蒼巖與我稱素交，乘冬間訊浮輕舸。探奇未暇坐甫定，仰見皓魄東南高。初聞未減月幾望，不同弦影含弓最。銀蟾初挾晚潮上，玉珎漸度林風颭。此時目力到煙海，微茫一片連洪濤。況當嚴辰斗插子，寒空氛翳無纖毫。人影在山月在水，風霜披拂惟吾曹。魚龍鼎沸棲鵲叫，應是水怪山精逃。廣寒之府不虛誕，雲

中定有仙人邀。始知天公昨調弄。品瑩欲聘光先縉。出門一笑大江湧。作詩紀事欣吾遭。

登雙峯閣得來字

高窗出林表。扳蘿窮崔嵬。衰齡失遠步。曠歲欣朋來。幽遐靈跡闕。晃朗香臺開。依然昔遊處。宛似清夢回。相情白雲內。流矚寒濤堆。遙峯各相屬。欲下仍徘徊。

歸宿南莊二絕

梅花閑與月明分。鶴欄鷗集共一羣。點起吟燈清不寐。江山回首足寒雲。圓蟾倒浸水精宮。三宿回船趁便風。歸到柴門翻悵望。不曾吹笛浪花中。

儀徵閨壘玉井

霍家橋道中

十里肩輿路。南莊喜重尋。霜空寒日上。沙岸早潮侵。舊識村三戶。遙看竹一林。寂寥人外境。已似入山深。

冬夜宿南莊

玉妃閨雪停寒空。林間梅蕊偷春工。疎花惺忪過微雨。冷挂半破新磨銅。人來月下傾醺醺。索笑巡檐看不足。會宿無分上下牀。吟詩只在東西屋。憶同遊日近清明。倏忽還同變雨晴。祇將樹底雙鳩喚。換得風前一雁聲。吾徒歲月毋虛擲。風流豈頓殊今昔。憑誰畫作輞川莊。我亦圖中一裴迪。

焦山觀音巖晚望用宋人趙冰壺韻

捫讀冰壺句。尙存虛亭人。坐水雲昏沙頭。一雁叢蘆沒。江上千峯落日吞。掃葉深林逢白足。扶藤危磴引青猿。茫茫目送東流去。終古潺湲漱石根。

焦山看月得小字

山風送月升林表。雲淨江寒絕飛鳥。乍起乍滅漁燈明。或往或來帆葉小。海門一派白漫漫。京口諸峯青杳杳。夜分天地轉空明。如此江山入吟眺。十年夢寐落巖阿。塵事苦多遊跡少。今來正值冬久晴。重向磯頭酌清醪。天公還我白玉盤。照徹長江波浩渺。須臾陡作風怒號。高浪排垠欲傾倒。攪動魚龍不肯眠。我歸一覺僧房曉。

登雙峯閣得雲字

雙峯杳何許。遙望生網緼。揅筇造絕頂。庵在山中分。一崦野梅發。數槌清磬聞。導我鵝菌閣。江水方斜曛。高寒有鳥跡。幽負無人羣。天風忽吹來。爐煙化爲雲。

歸宿南莊二絕

板橋初上晚潮痕。帶月人歸竹裏門。更爲梅花留一宿。好將清夢落江村。
小池凍合白琉璃。寫影寒林宿鳥枝。清境一時消受得。分燈水閣夜吟詩。

江都陸鍾輝南圻

霍家橋道中